

**Piniarneq aallaaniarnerlu pillugit Inatsisartut inatsisaata allanngortinneqarneranik Inatsisartut inatsisissaat nr. 11, 12. november 2001-imeersoq (Isertitat tamarmiusut tunggaviata, isumaginninnermi paaqqinnittarfinnut piniarnermut allagartat, sunngiffimmi piniarnermut aallaaniarnermullu akuersissutit, akiliisitsilluni piniartitsinermit akiliutit kiisalu piniarnermut allagartanik arsaarinnittarnermut malittarisassat allanngortinneqarneri)**

**§ 1.**

Piniarneq aallaaniarnerlu pillugit Inatsisartut inatsisaanni nr. 12-imi, 29. oktober 1999-imeersumi makku allanngortinneqarput:

**1. § 4, imm. 2, nr. 4** imatut oqaasertalerneqassaaq:

"4) piniarnermit, aallaaniarnermit aalisarnermillu isertitaqartunut isertitat tamarmiusut ikinnerpaamik 50%-iinik. Angallatit angallatip uuttuutaanut uppersaat naapertorlugu 150 BRT-init imaluunniit 210 BT-init anginerusut atorlugit aalisarnermit isertitat tamarmiusut piniarnermit, aallaaniarnermit aalisarnermillu isertitat tamarmiusut naatsorsuusiorneqarnerannut ilanngunneqassangillat. Qinikkatut pisortanillu toqqakkatut suliaaqqartitaanermi aningaasarsiat imaluunniit inuussutissarsiuutigalugu piniartut kattuffiisa/peqatigiiffiisa siulersuisuini sulinermit aningaasarsiat, piniarnermit, aallaaniarnermit aalisarnermillu isertitat tamarmiusut naatsorsorneqarnerannut imaluunniit isertitat tamarmiusut naatsorsorneqarnerannut ilanngunneqassangillat. Manna aalajangersagaq malillugu piniarnermit, aallaaniarnermit aalisarnermillu isertitat tamarmiusut naatsorsorneqarneranni isertitat tamarmiusut, akiliisitsilluni aallaaniartitsisarneq aalisartitsisarnerlu pillugit Namminersornerullutik Oqartussat nalunaarutaat malillugu akiliisitsilluni aallaaniartitsinermit aqqissuussinermit imaluunniit akiliisitsilluni aallaaniartitsinermit atatillugu ilisimasortatut suliffeqarnermit pisut ilanngunneqassapput."

**2. § 4-p** kingornanut ikkunneqassaaq:

"§ 4 a. Naalackersuisut isumaginninnermi paaqqinnittarfinnut, paaqqinnittarfiup inunnik perorsaanerani piniarnermik aallaaniarnermillu periaatsit atuisumut, inuussutissarsiuutigalugu piniarnermut allagartamik tunniussinermit atatillugu § 4, imm. 2, nr. 2-4-mi aalajangersakkat saneqqunneqarnissaannut akuersissuteqarsinnaapput. Aalajangersagaq una malillugu inuussutissarsiuutigalugu allagartamik immikkut akuersissuteqarnermi Naalackersuisut uumasut aalajangersimasut aallaaniarneqarsinnaanerit killiliivigisinnaa-vaat mattussinnaalluguluunniit.

*Imm. 2.* Naalackersuisut paaqqinnittarfik attuumassuteqartoq suleqatigalugu § 8, imm. 1, aamma §§ 12 - 13 naapertorlugit malittarisassianik malitsitsinissamut kina akisussaasuussanersoq tunaartarisassaliussapput."

**3. § 5-imi** ikkunneqassaaq:

"*Imm. 2.* Imm. 1-mi aalajangersagaq apequtaatinnagu piniakkanik killilersugaasunik sunngiffimmi piniarnissamut aallaaniarnissamullu akuersissutit qinnuteqaateqartoqarneratigut

tunniunneqarsinnaapput inunnut,

1) Kalaallit Nunaanni inuit nalunaarsorsimaffiannut nalunaarsimasunut aamma

2) ukiuni kingullerni qulini piffissaq qinnuteqarfik sioqqullugu ukiuni marlunni ataannartumik Kalaallit Nunaanni najugalittut inuit nalunaarsorsimaffianni nalunaarsorsimasunut."

**4. § 7, imm. 3 aamma 4** imatut oqaasertalerneqassapput:

*"Imm. 3.* Naalakkersuisut akuersissutit imm. 1-2-mi taaneqartut tunniunneqarnerannut atatillugu pisortanut akiliuteqaqqusinissaminnut piginnaatitaapput. Pisortanut akiliutit annertussusissaat Inatsisartunit inatsisartut inatsisaatigut aalajangersarneqassaaq.

*Imm. 4.* Naalakkersuisut imm. 1-2-imi akuersissutit taaneqartut tunniunneqartarnerat, pissarsiarineqartarnerat annaaneqartarnerallu pillugit erseqqinnerusunik maleruagassaliorsinnaapput."

**5. § 17-ip** kingornanut ikkunneqassapput:

**"§ 17 a.** Maleruagassanik § 17, imm. 1-2-mi taaneqartunik piaaraluni imaluunniit arlaleriarluni mianersuaalliorujussuarnikkut unioqqutitsisarsimasoq, piniarnermut allagartaajarneqarsinnaavoq allagartartaarsinnaajunnaartinneqarsinnaalluniluunniit, unioqqutitsisimaneranut atatillugu isumaqarsorinarpat pineqartoq siunissami illersorneqarsinnaasumik piniartarsinnaassanngitsoq. Tamannattaq atuuppoq aallaaniartilluni piaaraluni imaluunniit arlaleriarluni mianersuaalliorujussuarnikkut inummik allamik ajoqusiisimasutut imaluunniit tamatumunnga navianartorsiortitsisimasutut pisuussuteqartumut.

*Imm. 2* Piniarnermut allagartaqarsinnaajunnaarsitaasup, imaluunniit § 6, imm. 1 aamma § 7, imm. 4 malillugit piniarnermut allagartaajagaasup, piniarnermut allagartaq politiinut tunniutissavaa.

*Imm. 3.* Piniarnermut allagartaajagaaneq inaarutaasumik eqqartuunneqarnermiit ukiumit ataatsimiit tallimanut sivisussuseqarsinnaavoq, nutaamilluunniit aalajangiisoqarnissaata tungaanut.

Allagartaajagaaneq nutaamik aalajangiisoqarnissaata tungaanut pisimappat, ukiut tallimat qaangiunneranni allagartaajakkap qinnuteqarneratigut arsaagaanerup ingerlaannarnissaa unnerluussisussaataasunit eqqartuussivinnut suliassanngortinneqarsinnaavoq. Aalajangiineq eqqartuussivimmi aalajangiinikkut pissaaq. Piniarnermut allagartartaarsinnaajunnaarsitsilluni aalajangiisoqarpat apeqqut eqqartuussivinnut suliassanngorteqqinneqarsinnaavoq, taamaattorli siusinnerpaamik ukiut marluk qaangiunneranni."

## § 2.

Inatsisartut inatsisaat ulloq 1. december 2001-imi atuutilerpoq.

*Namminersornerullutik Oqartussat, ulloq 12. november 2001*

Jonathan Motzfeldt

/

Hans Enoksen